

# Pro Svizra Rumantscha s'engascha per La Quotidiana

La Pro Svizra Rumantscha exista dapi 25 onns e sa regorda da ses intent d'antruras

DAD ANDREAS CADONAU

■ **La Pro Svizra Rumantscha (PSR) ha lantschà ina acziun da promoziun per La Quotidiana. Ella regala abunaments da la LQ stampads u online per in mez onn. Principalmain per promover il contact da giuvnas e giuvens rumantschs ordvart l'intschess da tschep cun la Rumantschia. La PSR fa quai per plaschair dal schefredactor da La Quotidiana.**

La Pro Svizra Rumantscha sa regorda da sias ragischs. L'uniun è vegnida fundada da l'antier president da la Lia Rumantscha e cusseglier naziunal Toni Cantieni avant 25 onns cun l'intenziun da promover ina gasetta dal di rumantscha. Suenter tschintg onns e l'idea vegnida realisada. Uss, èn ses onn da giubileum, sa regorda la Pro Svizra Rumantscha (PSR) da sia intenziun d'antruras e lantschescha ina acziun da promoziun per La Quotidiana. Sco quai ch'il commember da la suprastanza da la PSR, *Clau Dermont*, ha explitgà regalia l'uniun abunaments da La Quotidiana en furma stampada u online e paja quels abunaments durant in mez onn. Actualmain tschertgia l'uniun persunas interessadas dad emprender d'enconuscher La Quotidiana durant quel mez onn sa chapescha cun l'idea da salvar ellas a lunga vista sco abunents da la gasetta dal di rumantscha. Sin la pagina rumantsch.ch san persunas interessadas agl'abunament s'annunziar. Dermont ha explitgà che la pagina stettia er averta ad abunents da LQ per annunziar persunas enconuscentas ed intermediar uschia ils abunaments da la PSR. El quinta da savair terminar l'emprima acziun sin la fin da l'onn uschia ch'ils abunents novs re-



La Pro Svizra Rumantscha ha lantschà ina acziun da promoziun tgirada dal suprastant Clau Dermont a favur da LQ.

FOTO Y. BÜRKL

tschaivian la gasetta online u tenor giavisch era stampada per l'emprima giada ils 3 da schaner 2017. Gist trais dis avant il giubileum da LQ ch'è cumparida per l'emprima giada ils 6 da schaner 1997. Il consuprastant da la PSR ha punctuà l'intenziun da vulair enfirmir uschia ils contacts principalmain da persunas giuvnas rumantschas che vivian en la Bassa cun la Rumantschia. Gist la pussaivladad da abunar online e da retschaiver la gasetta

sin il telefonin porschia in access actual sin l'entir mund. La PSR veglia cuntinuar cun l'acziun en il decurs da la stad.

## Per plaschair dal schefredactor

Satisfatgs da la acziun da la PSR è il schefredactor da La Quotidiana, *Martin Cabalzar*. Tant pli che la PSR veglia cuntanscher cun sia acziun novs tschertgels da persunas per LQ. Il schefredactor n'ha betg snegà che l'internet e las midadas dal

sa cuntgnair principalmain da la generaziun giuvna muntian ina sfida per las gasettas stampadas ed uschia era per LQ. El ha fatg attent ch'in abunament da LQ na porschia betg sulet tschintg dis per emna novitads en lingua rumantscha, mabain er access a l'archiv da LQ sin tut las ediziuns a partir da l'onn 1997. Era suenter 20 onns è Cabalzar persvadì che LQ gioghia anc adina ina impurtanta rolla, ina giada per la promoziun lingui-

stica e quai che pertutgia las infurmaziuns or da las regiuns e dals vitgs e la vita rumantscha. Ina gasetta che mettia a disposiziun texts en tut ils idioms includ rumantsch grischun avischinia uschia ils idioms in a l'auter sco era al rg. Cabalzar ha concedi ch'ì na saja betg reussi da realisar tut las ideas formuladas l'entschatta da LQ. Principalmain en Surmeir ed en l'Engiadina na saja i reussi da chattar l'accoglientscha giavischada. Tuttina saja la gasetta rumantscha dal di sa mantegnida malgrà tuttas nauschas prognosas dapi sia existenza.

## In impurtant med d'infurmaziun

La valor linguistica da LQ ha Dermont medemamain punctuà cun ina purschida actuala da texts rumantschs. Ed el ha ditg che la gasetta dal di rumantscha saja in impurtant med d'infurmaziun per gliend che saja interessada ed attaschada a la vita en ils vitg rumantschs. Tenor ses parairi èsi impurtant da mantgnair las resursas humanas a favur da la gasetta per tegnair ina buna qualitad schurnalistica. E Dermont vesa la necessitad da las medias rumantschas da definir in avegnir comunabel online. Per dar dumogn a las sfidas actualas ch'ils novs meds da comunicaziun muntan e per rinforzar las medias rumantschas. Per dar dumogn a quellas sfidas ha er il schefredactor da LQ stipulà sias visiuns, numnadamain da distribuir LQ en il futur sco gasetta gratuita, LQ, las «20 minutas» rumantschas. En scadin cas festivescha LQ da cuminanza cun l'Agentura da novitads rumantscha (anr) il giubileum da 20 onns ils 17 da mars 2017. Tranter auter en preschientscha da la directura da l'Uffizi federal da cultura, *Isabelle Chassot*.